

**Uunga siunnersuut: Sukisaarsaatigalugu aalisartunik aalisartitsinermut  
akuersissuteqartarneq pillugu Inatsisartut inatsisaat nr. xx, xx 2012-meersoq  
(Saqqummiussisoq Aalisarnermut, Piniarnermut Nunalerinermullu Naalakkersuisoq)**

**pillugu**

**Aalisarnermut, Piniarnermut Nunalerinermullu ataatsimiititaliap isumaliutissiissutaa.**

**Siunnersuutip aappassaaneerneqarneranut saqqummiunneqartoq.**

Aalisarnermut, Piniarnermut Nunalerinermullu ataatsimiititaliap suliarinninnerani ilaasortat uku ilaapput:

Inatsisartunut ilaasortaq Aqqaluaq B. Egede, Inuit Ataqatigiit, siulittaasoq  
Inatsisartunut ilaasortaq Niels Thomsen, Demokraatit, siulittaasioq  
Inatsisartunut ilaasortaq Juliane Henningsen, Inuit Ataqatigiit  
Inatsisartunut ilaasortaq Hans Aronsen, Inuit Ataqatigiit  
Inatsisartunut ilaasortaq Karl Lyberth, Siumut  
Inatsisartunut ilaasortaq Hans Enoksen, Siumut  
Inatsisartunut ilaasortaq Finn Karlsen, Siumut

UKA 2011-mi ulloq 13. oktober 2011 siullermeerereernerup kingorna Ataatsimiititaliap siunnersuut misissorpaa.

**Siunnersuutip imaa aamma siunertaa**

Inatsisisamut tunuliaqtaavoq akiliilluni aalisartitsinerup aningaasarsiornikkut pitsaaninngortinnejarnissaanut nalunaarusiaq, Aalisarnermut, Piniarnermut Nunalerinermullu Naalakkersuisoqarfimmit pilersinneqartumit Pisuussutinik uumassusilinnik naleqarnerulersitsinissaq pillugu Suleqatigiissitamit marts 2009-mi tunniunneqartoq.

Suleqatigiissitaliaq Aalisarnermut, Piniarnermut Nunalerinermullu Naalakkersuisumit pilersinneqarpoq, tassanilu peqataapput Inuussutissarsiornermut Suliffeqarnermullu

Naalakkersuisoqarfik, Kalaallit Nunaanni Takornariartitsinermut Inuussutissarsiornermullu Siunnersuisoqatigiit, Kalaallit Nunaanni Aalisarsinnaanermut Akuersissutinik Nakkutilliisoqarfik, KNAPK aamma KANUKOKA. Inuaqatigiit eqalunnit pissarsiaasa pitsaanerpaanngortinnejarnissaannut periarfissat nalunaarusiam eqqartorneqarput.

Inatsisikkut eqqarsaataavoq piumasaqaatinik killissarititaasunik pilersitsinissaq, taamaaliornikkut Kalaallit Nunaanni sukisaarsaatigalugu aalisarnerup siunissami ineriartornera ikorfartorneqarsinnaalluni, kiisalu siunissaq ungasinnerusoq isigalugu takornariartitsisartut najukkamiittut sukisaarsaatigalugu aalisarnermik takornariartitsinerup iluani kaaviiartitsinermik suliffissaqartitsinermillu malunnaatilimmik pilersitsinissaannut alloriarnerussalluni siulleq.

Inatsisisatut siunnersuutikkut kuunni ikittuni toqqakkani sukisaarsaatigalugu aalisarnermut immikkut pitsaalluinnartumik neqerooruteqarneq periarfissaalissaq, tamatumani nunanit allanit takornariat kikkut kuummut aalisariarsinnaanerat akuersissummik pigisaqartumit taamaallaat ataatsimit aqunneqassalluni. Taamaasillutik sukisaarsaatigalugu aalisartartut nunani allamiut immikkut pitsaalluinnartumik misigisaqarnissamut qulakkeerfigineqassallutik.

Innuttaasut Kalaallit Nunaanni najugaqavissut eqalunniartarnerat eqqarsaatigalugu inatsisisatut siunnersuutikkut saqqummiunneqartumit tamanna kalluarneqarnavianngilaq. Inuit kikkulluunniit Kalaallit Nunaanni najugaqartut manna tikillugu aalisarnermik killilersuinerit atuutereersut isiginiarlugit nunatta kuuini tamani aalisarsinnaapput.

### **Tusarniaaneq.**

Inatsisisatut siunnersuut ulloq 19. november 2010-miit ulloq 20. januar 2011-imut tusarniagassanut attuumassuteqartunut tusarniaassutigineqarnikuovoq.

April 2011-imi KANUKOKA aamma KNAPK kiisalu maj 2011-mi Nunatsinni Takornariaqartitsinermut Inuussutissarsiornermullu Siunnersuisoqatigiit peqatigalugit aamma malitseqartitsilluni ataatsimiittoqarpoq.

### **Siunnersuutip Ataatsimiitaliamit suliarineqarnera.**

Ataatsimiitaliap maluginiarpa inatsisisap siullermeerneqarnerani ataatsimut isigalugu inatsisisatut siunnersuut iluarismaarneqartoq. Ataatsimiitaliaaq pissanganartutut isumaqarfigaa inatsisisatut siunnersuutikkut inuussutissarsiornermut periarfissamik nutaamik Kalaallit Nunaatalu takornarissanut nunani allaneersunut tikitassatut pilerisaarutigalugu nittarsanneqarnerusinnaanera pillugu ammaassisoqassasoq.

Ataatsimiititaliaq paragraffinut ataasiakkaanut ima oqaaseqaatissaqarpoq.

**§§ 1 aamma 2.** Ataatsimiititaliami amerlanerussuteqartut (Inuit Ataqatigiinneersut aamma Demokratineersut) immikkut maluginiarpaat aalisarneq pillugu inatsimmut atuuttumut atatillugu kuummi imaluunniit imartami killilikkami pineqartuni nunaqavissut aalisarnermut maanna periarfissaat inatsisissatut siunnersuutikkut kalluarneqassanngitsut. Illuatungaatigulli inatsisissatut siunnersuutikkut inuit nunami namminermi aalisarsinnaanermut akuersissummik pissarsinikuusut kuunni imartanilu killilikkani akuersissuteqarfiusuni aalisarsinnaatitaanngillat, pineqartut tassaasinnaapput danskit innuttaasut Kalaallit Nunaanni aalajangersimasumik najugaqanngitsut, aamma inuit nunat allat naalagaaffiini innuttaasut ukiut siuliini marlunni Kalaallit Nunaanni aalajangersimasumik najugaqarsimannngitsut. Inatsit malittarisassanut atuuttunut naapertuuppoq, tassanilu qulakkeerneqarpoq nunamut immikkut attuumassuteqanngikkaanni pinngortitami isumalluutit piniarnikkut aalisarnernikkullu atorneqarsinnaanngitsut.

Ataatsimiititaliami ikinnerussuteqartut (Siumumeersut), isumaqarput qallunaat innuttaasullu nunani allamiut immikkut pineqarnerisigut paragraffini aalajangersakkat ammip qalipaataa tunngavigalugu immikkoortitserinermut attuumassuteqangajassinnaasut.

**§4.** Ataatsimiititaliap naatsorsuutigaa akuersissummik pigisaqtunut tamanut ataatsimut isigalugu piumasaqaataasut assigiissillugit akuersissutinut isumaqatigiissutit ilusilerneqassasut. Taamaattorli akuersissummut isumaqatigiissutit ima ilusilerneqartariaqarput, sumiiffinni ataasiakkaani pissutsit immikkut atuuttut isiginiarneqarsinnaallutik.

**Kapitel 4.** Kapitalimi aalajangersarneqarpoq kommuni sumiiffimmik sapingisaq malillugu najukkami inuttaasunit aalisarnermut atorneqarpiartangitsummiittumik inassuteqannginnermini najukkami tusarniaasarnissamik kommuni pisussaasoq. Taamaalilluni Ataatsimiititaliaq isumaqarpoq sukisaarsaatigalugu aalisarnermik akuersissuteqartarnermut sumiiffiit piukkunnarnerpaat toqqarnissaannut sumiiffimmi periarfissanik pitsaasunik isumannaarisooqasasoq. Sumiffimmillu ilisimasaqarneq tunngavigalugu sumiiffimmi sukisaarsaatigalugu aalisartut qassiusinnaanersut aamma aalisakkat qanoq amerlatigisut pisarineqarsinnaanersut pillugit inassuteqaasiortoqartassaaq.

Aaqqissuussineq nutaajuvoq, taamaattumillu aaqqissuussinerup qanoq annertutigisumik atorneqarnissaanut misilittagaqartoqanngilaq. Tamanna tunngavigalugu inatsisissamut siunnersummi § 13-imi akuersissutit amerlassusaannut taaneqartumut Ataatsimiititaliaq oqaasertaliussassaqanngilaq.

Ataatsimiititaliaq isumaqarpoq tunniussinissamut piumasaqaatit § 18-mi taaneqartut

tunngavilersorluagaasut, tamatumani taaneqarluni qinnuteqartup takornarissanik sukisaarsaatigalugu aalisarnermik aaqqissuussisarnermut siornatigut misilittagai, aamma aalisariartitsinermut atatillugu avatangiisinut tunngassuteqartut qinnuteqartumit qanoq iliuuseqarfingeqassanersut, Ataatsimiititaliarmi isumaqarami aaqqissuussinerup aallaqqaataanit iluatsilluarnissaa, ataatsimullu isigalugu takornariaqarnermik inuussutissarsiornermut iluaqutaasussamik nunarsuarmi sukisaarsaatigalugu aalisartartunit pitsaasumik tusaamaneqarnissaq pingaaruteqartorujussuusoq.

**§ 20.** Ataatsimiititaliami amerlanerussuteqartut (Inuit Ataqatigiinneersut aamma Demokratineersut) isumaqarput akuersissuteqarnerup sivisussusia ukiunut qulinut piffissaliinermit sivikinnerusoq tulluartuunngitsoq. Akuersissutinik piginnittuusunut ataasiakkaanut suliffeqarfimmik pilersitsinermut ingerlatsinermullu aningaasaliinissaq pisariaqarsinnaavoq. Nittarsaanermut pilerisaarutinut aningaasartuutit, ilaasunik angallassinissamut angallammik akuersissutitalimmik pisinissamut immaqalu illuaqqanik unnuisarfinnik pilersitsinissamut aningaasartuutit pisariaqarsinnaapput. Taakku aningaasartuutit tamaasa eqqarsaatigalugit Ataatsimiititaliaq isumaqarpoq ukiunit qulinut sivikinnerusumi akuersissummik pigisaqarnissaq tulluartuunngitsoq. Ataatsimiititaliami ikinnerussuteqartut (Siumumeersut) isumaqarput akuersissuteqartarnermut piffissaliisarneq sivisunerpaamik ukiunut tallimanut aalajangerneqassasoq, suliffeqarfifiit piffissamut ungasinnerusumut pilersaarusiortanngimmata.

Ataatsimiititaliaq isumaqarpoq piffissap akuersissuteqarfiusup qaangiunnerani akuersissummik pigisaqartup akuersissut toqqaannartumik ingerlaannaq pissarsiareqqissinnaasariaqanngikkaa. Piffissap qaangiunnerani qinnuteqartut arlaqarpata, taakku immikkut nalinerneqassapput, naleqqunnerpaarlu akuersissummik tunineqarluni. Akuersissummik pigisaqartoq piffissami naammaginartumik ingerlatsisimappat tamanna soorunami taakkua nalinerneqarneranni ilaatinneqarsinnaapput.

**§ 21.** Ataatsimiititaliaq isumaqarpoq amerlanerpaamik akuersissutinik marlunnik tunniussisinnaaneq pillugu aalajangersagaq aallaaviusoq pitsaasoq. Piffissaq ungasinnerusoq eqqarsaatigalugu Ataatsimiititaliaq isumaqarpoq tutsuiginartumik akuersissummik qinnuteqartut qassiunerat, kuuit imartallu killilikkat toqqrerneqartut qanoq siamasitsignerat, kiisalu akuersissutinut ataasiakkaanut aningaasartuutit tamatumanilu naammattumik nittarsaanermut pilerisaarutinut aningaasartuutit qanoq annertutignerat maluginiarneqalerpata apeqqut tamanna qaqqeqqinnejartariaqartoq.

**§ 22.** Ataatsimiititaliap inummut ataatsimut ullormut 150 kr.-nik akiliisitsisarnissamut siunnersuut isummersorfigaa, kiisalu amerlanerussuteqartut (Inuit Ataqatigiinneersut aamma Demokratineersut) inatsisisstatu siunnersuummi nassuaatini taaneqartut aallaavigalugit taakku tunngaviatigut naammaginartutut isumaqarfingeqassanersut. Amerlanerussuteqartut

isumaqarput akiliut annertusineqarpallaassanngitsoq, taamaalilluni suliffeqarfinnik isumatusaartumik pilersitsiniarnerit akuersisummik qinnuteqartunit tunuarsimaarfigineqassanngimmata.

Ataatsimiitaliami ikinnerussuteqartut (Siumumeersut) isumaqarput, sukisaarsaatigalugu aalisarnermut akiliut inummut ataatsimut ullormut 450 kr.-nik annertussusilerlugu aalajangerneqassasoq.

Ataatsimiitaliaq isumaqarpoq, Kuunni imartanilu killilikkanı ataasiakkaani sukisaarsaatigalugu aalisartartut akiliisartut qassiunerat paasineqarpat akiliut nalileqqinnejartariaqartoq. Siunissamittaaq aalisarnerup suli pilerinarnerusunngortinnissa siunertaralugu aalisakkat piaraannik avalatsitsisarnissamut immaqa immikkut akiliuteqartitsisarneq eqqarsaataalersinnaavoq. Taamaattorli tamatumunnga atatillugu Ataatsimiitaliap naatsorsuutigaa aaqqissuussinikkut aalisakkat ikittuinnaat pisarineqartassasut, sukisaarsaatigalugumi aalisartut amerlasuut aalisakkat avalatseqqittarnissaat toqqartassagamikku.

**§ 23.** Ataatsimiitaliami amerlanerussuteqartut (Inuit Ataqatigiinneersut aamma Demokratineersut) isumaqarput akuersissut qaqtiguinnaq atorneqartarpats arsaarinnissutaasinnaanera tulluartuusoq. Akuersissut annikitsuinnarmik atorneqartarpats tamanna akuersisummik pigisaqartup aallussilluannginneranik pissuteqarsinnaavoq imaluunniit aalisarfiusup pilerinannginneruneranik. Ataatsimiitaliaq isumaqarpoq akuersissutip akuersissuteqartumit allamit sunniuteqarluartumik immaqa sumiiffimmi allami atuisinnaaneranut pissutsit tamakku mattussisariaqanngitsut. Ikinnerussuteqartut (Siumumeersut) aalajangersagaq naammaginanngitsutut isumaqarfigaat, kuuit ilaanni tamatuma maleruarneqarnissaajornakusoorsinnaammat.

### **Avatangiisinut pinngortitamullu sunniutaasut**

Akuersisummik tunniussineq kuummik piujuartitsineq tunngavigalugu atuinermut piumasaqarnermik nassataqarpoq, aamma akuersisummut isumaqatigiissutip avatangiisitigut piumasaqaatitaani sumiiffimmi kuup eqqaani eqqiluititsinissamik sukujoqartitsinnginnissamillu piumasaqartoqarluni. Aaqqissuussinermi isumat pingaaruteqartut ilagaat takornarissat pinngortitamik innarlerneqarsimannngitsumik kusanartumillu takutinnissaat.

### **Siunnersuutip aningaasatigut sunniutissai**

Ataatsimiitaliaq isumaqarpoq aaqqissuussinernut nunamut iluaqtaasussatut kinguneqartussatut naatsorsuutigineqartunut aningaasartuutit inatsisisatut siunnersuummi taaneqartut isertitassanut ussassaarinernillu suliniutissanut sanilliukkaanni tulluartuusut.

**Ataatsimiititaliap inassutai.**

**Ataatsimiititaliaq isumaqatigiittoq** inatsisissatut siunnersuutip saqqummiunneqartup  
Inatsisartunit aappassaaneerneqarnerani akuerineqassasoq **inassuteqarpoq.**

**Taamaattorli Ataatsimiititaliami ikinnerussuteqartut** Siumumit sinniisut peqatigitillugu  
**kaammattuippuit**, Naalakkersuisut pingajusaaneerinninnermi allannguutissatut  
siunnersummik saqqummiussissasut, taamaalilluni § 20-mi akuersissuteqartarnerup  
sivisussusaa ukiunit quliniit ukiunut tallimanut allanngortinneqarluni, aamma § 22, imm. 1-  
imi inummut ataatsimut ullormut akiliutigineqartartoq 150 kr.-niit 450 kr.-nut  
allanngortinneqarluni.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap  
siunnersuut aappassaaniigassangortippaa.

Aqqaluaq B. Egede  
Siulittaasoq

Niels Thomsen  
Siulittaasup tullia

Hans Aronsen

Juliane Henningsen

Karl Lyberth

Finn Karlsen

Hans Enoksen